

Awe Nò...Falta 1007 Aña!

Aparentemente un susto formal pa ku fin di mundu ta poderá di hopi hende. Ora algu fuera di normal sosodé, inmediatamente nan ta sklama, "Mundu ta kaba!" Kisas ta bos i welek spantoso, stòf di Sahara den laira, eskalashon den kriminalidat, vários temblor, èts.

Sin duda mundu manera nos konos'é lo kaba! Palabra di Dios mes ta afirmá esei! "...shelunan lo pasa ku un boroto imensu, i e elementunan lo dirti di kalor di kandela, i tera i tur obranan ku ta den lo kaba pa kandela kompletamente. ...shelunan lo peresé pegá pa kandela i e elementunan kimando lo dirti. Ma nos ta spera, segun Su promesa, shelu nobo i tera nobo unda hustisia ta biba" (2 Pedro 3:10,12-13).

Probabelmente e teskto aki ta referí na un purifikashon (no destrukshon) di mundu aktual dor di kandela. Pues, e "tera nobo" t'esun aktual, solamente purifiká. Esaki ta kuadra ku otro tekstonan ku ta komuniká ku "tera ta permanesé pa semper" (Eklestias 1:4).

Ki fecha esaki lo sosodé? Segun Pacal Votan, profeta di Federashon Galáktiko na Chile, mundu mester kaba dia 16 di ougùstùs...**AWE!** Ma no preokupá...**NO TA AWE!**

Ku frekuensia un sekta òf persona ku a apuntá su mes komo profeta ta pronostiká fin di mundu, binida di Kristu, Armagedon, èts. Ma nan **TUR TA KIBOKA**. Hesus a deskurashá ponementu di fecha pa eventonan profétiko. "Ni dje dia ni dje ora ei ningun hende no sabi nada, ni e angelnan di shelu, sino Mi Tata so" (Mateo 24:36). Ora Su apòstelnan a puntr'E tokante un evento profétiko nèt promé ku El a subi bai shelu, Hesus a respondé, "No ta toka boso di sabi e tempunan i momentunan ku e Tata a pone..." (Echunan 1:7). Dios so sa fecha ku Kristu ta regresá, Armagedon, fin di mundu, èts.

Maske esei ta bèrdat, Beibel ta mensioná hopi evento ku mester sosodé **PROMÉ KU MUNDU KABA**. Durashon di dos evento so ta ser indiká. For di esaki nos por dedusí ku un **MINIMO DI 1007 AÑA** mester pasa **PROME** ku fin di mundu.

E "rpto" (ora Hesus ta bin tuma tur esnan ku a asept'E) por sosodé na kualke momentu...asta **AWE!** Esaki lo inisiá loka ta yamá e "tribulashon," un periodo di tempu ku Dios lo basha Su rabia kontra habitantenan di mundu ku no a konfia Kristu pa nan salbashon. E lo ta un tempu di sufrimentu horibel, muchu mas pió ku mundu a yega di konosé. Ningun teksto di Beibel ta deklará **SIGUR** kuantu tempu e "tribulashon" lo dura, ma vários teksto ta impliká ku esaki lo tin durashon di shete aña (e.o. Daniel 9:24-27).

Kristu lo bin na mundu, klousurá e tribulashon, i establese Su reino literal (no simbóliko òf spiritual) riba mundu. Hesus lo reina pa mil aña, p'esei ta yamá e tempu aki "milenio." Satanas lo ta mará pa e mil aña (Revelashon 20:1-7). E lo ta un era di pas i hustisia perfekto.

Na final di Kristu Su reinado di mil aña, mundu manera nos konos'é lo kaba. Pues, si e tribulashon ta dura shete aña, i e milenio ta dura mil aña, fin di mundu no por yega awe; ta falta **POR LO MENOS 1007 AÑA**.

Ma maske mundu no ta kaba awe òf por lo pronto, esei no kier men ku nos por biba kon ku ta awor. Fin di mundu mester motivá nos pa evaluá nos prioridatnan, aseptá Kristu, i biba manera Dios ta deseá. "Asina anto ku tur e kosnan aki lo peresé, ki un bida santu i deboto lo kunbiní pa boso hiba" (2 Pedro 3:11).

Kristu por presentá na kualke instante i saka for di mundu esnan ku a konfi'E pa salba nan for di kastigu ku nos tur ta meresé. Esnan ku ta keda tras lo mester pasa den e sufrimentu teribel di e tribulashon.

Ademas, ningun di nos sa ki momentu morto por kai. Den un será di wowo, bo bida por ser kitá i bo lo tin ku duna kuenta na Dios. Si bo no a atmití na Dios ku bo ta un pekador i konfia Kristu pa salbábo, tin un destinu so...fièrnu.

Skritura ta bisa bon kla, "awor ta e dia di salbashon" (2 Korintionan 6:2). **AWOR** ta tempu pa hasi e desishon pa evitá e "tribulashon"! **AWOR** bo tin chèns pa kambia bo destino eterno! **AWOR** bo por pidi Kristu pa salbábo di e kastigu ku bo ta meresé pa bo piká na fièrnu, bira lomba pa piká, anto biba pa Dios! No bisa "Awe nò...ta falta 1007 aña!"